

太平寰宇記

八

中國古代地理總志叢刊



太平寰宇記

中國古代地理總志叢刊

太平寰宇記

〔宋〕樂史撰
王文楚等點校

中華書局

太平寰宇記卷之一百七十二

四夷一

四夷總序

周禮司徒：「以土圭之法測土深，正日景以求地中。日南則景短多暑，日北則景長多寒，日東則景夕多風，日西則景朝多陰。日至之景，尺有五寸，謂之地中，天地之所合也，四時之所交也，風雨之所會也，陰陽之所和也。然則百物阜安，乃建王國。」李淳風曰：「今洛陽告成縣以土圭測天地之中也。」然則四夷之所距，推此可知焉。爾雅云：「東至于泰遠，西至于邠國，南至于濮鈐，北至于祝栗，謂之四極。皆謂四方極遠之國。」觚竹、北戶、西王母、日下，謂之四荒。觚竹在北，北戶在南，西王母在西，日下在東，皆四方昏荒之國，次四極者。「二」九夷、八狄、七戎、六蠻，謂之四海。九夷在東，八狄在北，七戎在西，六蠻在南，次四荒者。距齊州以南，戴日爲丹穴，距，去也。齊，中也。北戴斗極爲空桐，戴，負也。「三」東至日所出爲太平，西至日所入爲大蒙。即

蒙汜也。太平之人仁，丹穴之人智，大蒙之人信，空桐之人武。地氣使然。」此五方之性也。太演十二次分野圖云：「天下山河之象，在乎兩戒：『北戒』地形自三危、三危山在沙州燉煌縣。積石，負終南，積石山在鄯州龍支縣，終南山在長安縣。地絡之陰，東及太華，今華州鄭縣。而逾河，並雷首，山在今蒲州河東縣。砥柱，至于王屋，今洛陽王屋縣。太行，今澤州晉城縣。乃西北抵常山，山在今鎮州。之右，東折循塞垣至濊貊、朝鮮，是謂『北紀』，所以限戎狄也，^(三)故星傳謂之『北戒』，或謂之『胡門』；『南戒』地形自岷山、在茂州汶山縣。蟠冢，今在梁州金牛縣。負終南，地絡之陽，東及太華，在華州。抵商山，在商州。阻熊耳，連外方，熊耳山在號州盧氏縣。桐柏，南折自上洛南逾江漢、桐柏山在唐州。武當、荆山，至于衡陽，武當山在均州，荆山在襄州南漳縣，衡陽山在衡州。乃東折嶺徼，達東甌、今福州。閩中，是謂『南紀』，所以限蠻夷，星傳謂之『南戒』，亦謂之『越門』。華裔之大經也。」尚書五服之制，去王城面五百里甸服，又五百里侯服，又五百里綏服，又五百里要服，距王城凡二千里，其外五百里荒服。國語曰：「周穆王征犬戎，得白狼、白鹿以歸，^(四)自後荒服不至。」然則二千里之外乃四夷。及蠻夷猾夏，詩云：「獫狁匪茹，整居焦穫。」今岐州。又秦晉遷陸渾之戎于伊川，今陸渾縣，則參居中國矣，而其本域蓋四荒之裔也。記曰：「東方曰夷，被髮文身，有不火食者矣。夷者，氐也^(五)東方之人好生，萬物氐觸地而出，以其居東，故曰東夷。夷有九種：一曰玄菟，二曰樂浪，三曰高麗，四曰滿飾，^(六)五曰島夷，^(七)六曰索家，七曰東屠，八曰倭

人，九曰天鄙，謂之九夷。文身謂以丹青文飾其身。有不火食者，以其地氣多煖，雖不火食不爲害也，言有不火食者，亦有火食者。南方曰蠻，雕題交趾，有不火食者矣。君臣同川而浴，極爲簡慢。蠻者，慢也。其類有八：一曰天竺，二曰咳首，三曰僬僂，四曰破踵，五曰穿胸，六曰僮耳，七曰狗軋，八曰旁春。雕題交趾者，題謂額也，謂以丹青雕刻其額，非唯雕題，亦文身也，故仲雍居吳越，左傳曰：「斷髮文身。」趾，足也，言蠻卧時頭向外，足在內而相交，故云交趾。不云被髮者，髮斷故也。注云：「雕文謂刻其肌，以丹青涅之；交趾，足相向。言浴則同川，卧則僂，不火食，地氣煖，不爲病。」按漢書地理志：「越俗斷髮文身，以避蛟龍之害。」故刻其肌，以丹青涅之，以東南俱近于海，故皆文身。爾雅中言六蠻也。西方曰戎，被髮衣皮，有不粒食者矣。戎，凶也，斬伐殺生，故曰戎。然戎有六：一曰僬僂，二曰戎央，三曰老白，四曰耆羌，五曰鼻息，六曰天剛。衣皮不粒食者，以其無絲麻，惟食禽獸肉，故衣皮。地氣寒，少五穀，故有不粒食者。爾雅中言七戎，七曰山嵛是也。北方曰狄，衣羽毛穴居，有不粒食者矣。狄者，辟也，父子同穴無別，其行邪辟，故曰狄也。類有五：一曰月支，二曰濊貊，三曰匈奴。四曰單于，五曰白屋。東方多鳥，故曰衣羽，正北多羊，故曰衣毛；凝寒至盛，林木又少，故穴居，亦少五穀，故不粒食也。爾雅言八狄，多六曰宣威，七曰宣赫，八曰達旦，禮只云五，五狄也。中國、夷、蠻、戎、狄，皆有安居，和味，宜服，利用，備器。其事雖異，各自足。五方之民，言語不通，嗜慾不同，達其志，通其欲。東方曰寄，此言帝王立此傳達四方之人，東方謂之寄也。南方曰象，西方曰狄鞮，北方曰譯。皆俗間之名，依其事類耳，鞮之言知也。今冀州部有言狄鞮也。先王以是總知其情而從其俗，務以德安其性，不以力致其來。其國土之別，固已具于職方

誦訓矣。禹之敷土也，使大章亥步四極之所距，〔一〕海外之地，則山海經存焉。方言國號，今古不同，備其紀綱，難可盡究。自是以降，唐史所書，推其土域所存，記其名號之變，載于國史之末，以備華夏之文。至于戰伐之情，朝貢之數，事此非禮，不復具焉。凡今地理之說，蓋定其方域，表其山川，而四夷之居，本在四表，雖獫狁之整居焦穫，陸渾之處于伊川，其人則夷，其地則夏，豈可以周原、洛邑謂之夷裔乎！昔唐開元、天寶之盛也，南至越裳，北至雲朔，東窮遼石，〔二〕西及河湟，皆爲郡縣，覃于風教，既編九州之記，豈可具之于四夷。兩漢之制，縣有蠻夷曰道，而其總述皆九牧之所領矣，是以今四夷之所說，皆其裔荒之本土焉。

東夷一

東夷總述

東夷之地，自胸山而東，其北則樂浪、音洛郎。〔一〕朝鮮、遼東，其南則越閩、晉安。泉州之東，今泉州濱海極望，海中諸夷國可見焉。皆其域也。昔周武王封殷太師箕子于朝鮮，而遼東則戰

國時燕地，而帶方、真番、音蕃。〔二〕玄菟，音徒。〔三〕皆漢之郡，後皆爲東夷之地矣。蓋先王之時，罔不率俾，夏太康失德，夷人始叛，至桀而諸夷內侵。殷仲丁伐藍夷，後雖凌暴諸夏，而其境則遼海之東焉。遼，故燕地，秦爲徼外，秦亂，而中國人多往避地焉。漢興，修遼東故塞，至溟渤拜切。〔三〕水爲界，屬燕。燕王盧綰反，燕人衛滿亡命而出塞，渡溟水，居秦故空地，王之地方數千里。至漢武帝破之，以朝鮮爲真番、臨屯、樂浪、玄菟四郡。後漢末，公孫康據而有之，魏景初元年乃滅。後魏、周、齊以來，高麗強盛，隋煬帝三征之，初遼遠而敗，再行，次遼水征之而楊玄感反，又將征之而天下亂。至唐高宗乃滅之。其餘具于本國矣。

朝鮮 濊國 百濟國 三韓國

朝鮮

朝鮮，晉張華曰：朝鮮有泉水、洌水、汕水，三水合爲洌水，疑樂浪、朝鮮取名于此也。汕，所宴切。周封箕子

之國。昔武王釋箕子之囚，箕子不忍周之釋，走之朝鮮。武王聞之，因以朝鮮封之。見尚書大傳。箕子教以禮義、田蠶，作八條之教，無門戶之閉而人不爲盜。其後四十餘代，至戰國時，朝鮮侯亦僭稱王。始全燕時畧屬焉，爲置吏，〔四〕築郭塞。其後燕王盧綰反，入匈奴。

燕人衛滿亡命，聚黨千餘人，椎結蠻服，東走出塞，渡涇水，擊破朝鮮王準，居秦故空地上，下鄣，稍役屬真番、朝鮮諸夷及故燕、齊亡命者王之，都王險。地名，在涇水東。會孝惠、高后

時，天下初定，遼東太守即約滿爲外臣，保塞外蠻夷，是故滿得以威力侵其傍小邑，真番、臨屯皆來服屬，地方數千里。傳子至孫右渠，誘漢亡人滋多。武帝元封二年遣樓船將軍楊僕

從齊浮渤海，兵五萬，左將軍荀彘出遼東討之，三年朝鮮人殺右渠來降，遂定其地，因立爲真番、臨屯、樂浪、玄菟四郡。今悉爲東夷之地也。昭帝時罷臨屯、真番以併樂浪、玄菟，自此內屬。

四至：秦滅燕，屬遼東外徼。秦遼東郡，今安東府之地。及秦亂，中國人或往避地者數萬口。漢興，爲其遠難守，復修遼東故塞，至涇。潁拜切。水爲界。武帝時即爲四郡之地。(二五)

土俗物產：始箕子以八條之教，世得其理。自漢內屬以後，風俗稍薄，法禁亦寢多，至於六十餘條。按四夷志云：「東方仁，故其俗頗有中國之風。孔子欲居九夷，又聞邾子述烏官曰：『天子失官，學在四夷也。』其俗土著，遲畧切。喜飲酒歌舞，或冠弁衣錦，器用俎豆。

濊國

濊。亦朝鮮之地，後漢光武封其渠帥爲縣侯，皆歲時朝貢。無大君長，漢以來，(二六)其官有侯、邑君、三老，統主下戶。其耆舊自謂與高句麗同種，言語法俗大抵相類。魏齊王正

始六年，滅侯等舉邑降，四時詣樂浪、帶方二郡朝謁。並今東夷之地。有軍征賦調，如華人焉。

四至：南與辰韓、北與高句麗、沃沮接，東窮大海，西接樂浪。

土俗物產：其人性謹愿，少嗜慾，有廉恥。男女衣皆著曲領，男子繫銀花，廣數寸，以爲飾。俗重山川，山川各有部分，^(二)不得輒相干涉。同姓不婚，多所忌諱，疾病死亡，即棄舊宅。知種麻，養蠶，作綿布。又頗曉氣候星宿，先知年歲豐約。不以珠玉爲寶。又祭虎以爲神。其邑落有侵犯者，輒相罰，責生口牛馬，名之爲「責禍」。少寇盜。作矛長三丈，或數人共持之，能步戰。樂浪檀弓出其地。又多文豹，有果下馬，高三尺，一作「丈」。其海出斑魚皮，漢時恒獻之。

百濟國

百濟。即後漢末夫餘王尉仇台之後。後魏時，百濟王上表云：「臣與高麗源出夫餘也。」初以百家濟海，因號百濟。晉時句麗既畧有遼東，而百濟亦據有遼西、晉平二郡地。今營、平二州之間也。自晉以後，吞併諸國，據有馬韓地。晉代授蕃爵，自置百濟郡。義熙中以百濟王夫餘暎他典切。爲使持節、都督百濟諸軍事。^(三)宋、齊、梁並遣使朝貢，授官，封其人。土著地多下濕，率皆山居。其王都有東西二城，號建居拔城。王號「于羅瑕」，百姓呼

爲韃音乾。吉支，夏言並王也。王妻號「于陸」。夏言妃也。官屬有十六品：左平一品，達率二品，恩率三品，德率四品，扞率五品，〔三〕奈率六品，〔三〕以上冠飾銀花；將德七品，紫帶；施德八品，阜帶；固德九品，赤帶；季德十品，青帶；對德十一品，文督十二品，皆黃帶；武督十三品，佐軍十四品，振武十五品，剋虞十六品，皆白帶。統兵以達率、德率、扞率爲之，人庶及餘小城咸分隸焉。其國用法：叛逆者死；殺人者以奴婢三人贖；官人受財及盜者，三倍追贓。其王以四仲月祭天及五帝之神，每歲四祠其始祖仇台之廟。大姓有八族：謂沙氏、燕氏、茹氏、〔三〕解氏、真氏、國氏、木氏、苜氏。〔三〕苜，音白。國西南人島居者十五所，皆有城邑。

後魏孝文帝遣衆征破之，後其王牟大爲高句麗所破，衰弱累年，遷居南韓舊地。隋初，其王夫餘昌遣使貢方物，〔三〕拜爲帶方郡公、百濟王。唐武德四年，其王夫餘璋遣使獻果下馬。與新羅世爲仇讎。貞觀十六年，與高麗通和，以絕新羅入朝之道。太宗新征高麗，百濟懷二，〔三〕數年之間，朝貢遂絕。顯慶五年，蘇定方討平之，因虜其王義慈以歸。其地舊有五部，分統三十七郡、二百城、七十六萬戶，至是以其地分置熊津、馬韓、東明、金連、〔三〕德安等五都督府，以其酋渠爲都督府刺史、縣令，命右衛郎將王文度爲都督，總兵以鎮之。至麟德三年，其舊地没于新羅，城傍餘衆後漸寡弱，散投突厥及靺鞨，其主夫餘崇竟不敢還。

舊國，^(二六)土地盡没于新羅、靺鞨，夫餘氏君長因之遂絕。義慈事親以至孝聞，友于兄弟，時人號爲「海東曾閔」，及至京數日病卒，葬于孫皓、陳叔寶墓側。

四至：其國東西四百里，^(二七)南北九百里，南接新羅，北距高麗千餘里，西限大海，過海至越州，處小海之南，南渡海即至倭國。

土俗物產：其衣服男子略同于高麗，拜謁之禮，兩手據地爲敬。婦人衣似袍而袖微大，在室者編髮盤于首，後垂一道爲飾，出嫁者乃分爲兩道焉。兵有弓箭刀稍，重騎射，兼愛墳史，其秀異者頗解屬文，又解陰陽五行。用宋元嘉曆，以建寅月爲歲首。亦解醫藥、卜筮、占相之術。有投壺、樗蒲等雜戲，然尤尚弈棋。僧尼、寺塔甚多，而無道士。賦稅以布、絹、麻、米等。^(二八)婚娶之禮，畧同華俗，父母及夫死，三年持服，餘親則葬訖除之。氣候溫煖，五穀、雜果、蔬菜及酒醴、肴饌、樂器之屬，多同于內地，惟無駝、驢、騾、羊、鵝、鴨等。西南海中有三島，其上出黃漆樹，^(二九)似小擾樹而大，^(三〇)六月輒取其汁，漆器物色如黃金，其光奪目。

三韓國

馬韓。後漢時通焉。有三種：一曰馬韓，二曰辰韓，三曰弁韓。三韓之地，凡大小共七十八國，或云百濟是其一國焉。大者萬餘戶，小者數千家，各在山海間，地合方四千餘

里，〔三〕東西以海爲限，皆古之辰國也。馬韓最大，共立其種爲辰王，都目支國，盡王三韓之地。其諸國王先皆是馬韓種焉。

辰韓。耆老自言秦之亡人，避苦役適韓，韓割東界地與之。有城柵。其言語有類秦人，由是或謂之秦韓。其王常用馬韓人作之，代相係襲，辰韓不得自立爲王，明其流移之人故也。其俗名國爲邦，弓爲弧，賊爲寇，行酒爲行觴，相呼爲徒。諸小別邑，各有渠帥，大者名臣智，次有儉側，〔三〕次有樊濊，〔三〕次有殺奚，次有邑借，皆其官名。人文身。步戰兵仗，與馬韓同。

弁韓。與辰韓雜居，城郭衣服皆同，言語風俗祀神有異，施竈皆在戶西。

初，朝鮮王準爲衛滿所破，乃將其餘衆數千人走入海，〔三〕攻馬韓，破之，自立爲韓王。準後滅絕，馬韓人復自立爲辰王。後漢光武時，韓人廉斯人蘇馬謨等詣樂浪貢獻，謨，音是。帝封蘇馬謨爲漢廉斯邑君，使屬樂浪郡。靈帝末，韓、濊並盛，郡縣不能制，百姓苦亂，多流亡入韓者。建安中，公孫康分屯有、有鹽二縣以南荒地爲帶方郡，〔三〕因遣公孫模、張敞收遺民，伐韓、濊，舊民稍出。是後倭、韓遂屬帶方郡。魏明帝初，遣帶方太守劉昕、樂浪太守鮮于嗣越海定二郡，部從事吳林以樂浪本統韓國，分割辰韓八國以屬樂浪。晉武帝咸寧中，馬韓主來朝，自後無聞。按三韓尋爲百濟、新羅所併。

四至：馬韓在西，五十有四國，其北與樂浪接，南與倭接。辰韓在東，十有二國，其北與濊貊接。弁韓在辰韓之南，亦有十二國，與倭接。

土俗物產：馬韓人知田蠶，作綿布，出大栗如梨，有細尾雞，尾長五尺。邑落雜居，亦無城郭，作土室，形如冢，開戶在上。不知跪拜，無長幼男女之別，少綱紀。國邑雖有主帥，不能相制御。其葬有棺無槨。不知騎乘牛馬，不貴金寶錦罽，惟重瓔珠，以綴衣爲飾，及懸頸垂耳。大率皆魁頭魁，科也。露髻，布袍草履。其人勇壯，少年有築室作力者，輒以繩貫脊皮，以杖捶繩，嚙呼爲健，嚙音喧。終日力作，不以爲痛。善用弓、楯、矛、櫓，雖有鬪爭攻戰，而貴相屈服。俗信鬼神，^{〔三〕}常以五月耕種畢祭鬼神，晝夜酒會，羣聚歌舞，舞輒數十人相隨踏地爲節。十月農功畢，亦復如之。諸國邑各以一人主祭天神，^{〔三〕}號「天君」，又立蘇塗，有似浮屠。建大木以懸鈴鼓事鬼神。其南界近倭，亦有文身者。

又有州胡，在馬韓之西海大島上，^{〔三〕}其人差短小，語言不與韓同，皆髡頭如鮮卑，衣草衣，有上無下。好養牛豕，乘船往來貨市韓中。

辰韓，其地肥美，宜五穀，知蠶桑，作縑布，乘駕牛馬，嫁娶以禮。其俗男女有別，以大鳥羽送死，其意欲使死者神魂飛揚也。國出鐵，韓、濊、倭皆從取之，凡諸市易皆用鐵，如中國用錢刀，又以供給二郡。俗喜歌舞、飲酒、鼓瑟，瑟形如筑，彈之有音曲。兒生便以石壓

其頭，欲令其扁，故辰韓之人皆扁頭。男女近倭。〔三九〕

弁韓，其俗衣服皆與辰韓同。

卷一百七十二校勘記

〔一〕四方「方」，底本作「荒」，萬本同，據庫本及爾雅釋地郭璞注改。

〔二〕負也「負」，萬本、庫本同，爾雅釋地郭璞注作「值」。

〔三〕所以限戎狄也「戎狄」，萬本同，庫本作「中外」。

〔四〕得白狼白鹿以歸 按國語周語作「得四白狼、四白鹿以歸」，史記卷四周本紀同，此疑脫「二」「四」字。

〔五〕觥也「觥」，底本作「觚」，萬本、庫本同。按禮記王制唐孔穎達疏：「風俗通云：東方人好生，

萬物觥觸地而生。夷者，觥也。」後漢書卷八五東夷列傳：「夷者，抵也，言仁而好生，萬物抵地而出。」太平御覽卷七八〇引後漢書曰：「夷者，抵也。」抵，同觥，此「觚」乃「觥」形近而訛，據改。

〔六〕滿飾「滿」，底本作「蒲」，萬本、庫本同。按禮記王制唐孔穎達疏、爾雅釋地宋邢昺疏皆作「滿」，此「蒲」爲「滿」字之誤，據改。

〔七〕島夷 萬本同，庫本作「鳥夷」，禮記王制孔穎達疏、爾雅釋地邢昺疏作「鳧夷」，庫本之「鳥」爲

「鳧」字之誤，則作「鳧臾」是。

〔八〕使大章亥步四極之所距 原校：「按大章亥，山海經作豎亥。」

〔九〕東窮遼石 「石」字未解，疑爲「左」或「右」字形近而訛，又或爲「碣」字之誤。

〔一〇〕音洛郎 萬本、庫本皆無此三字。

〔一一〕音蕃 萬本無此二字。

〔一二〕音徒 萬本無此二字

〔一三〕滂拜切 萬本無此三字。

〔一四〕爲置吏 「爲」底本作「而」，據萬本、庫本史記卷一一五朝鮮列傳、漢書卷九五朝鮮傳、後漢書卷

八五東夷列傳李賢注引前書及傳校改。

〔一五〕武帝時即爲四郡之地 「時」，萬本、庫本皆作「因之」。

〔一六〕遲畧切 萬本、庫本皆無此三字。

〔一七〕漢以來 庫本同，萬本「漢」上有「自」字，同通典卷一八五邊防一。

〔一八〕山川各有部分 「分」，通典邊防一同，後漢書東夷列傳作「界」。

〔一九〕夫餘映 「映」，萬本、庫本皆作「腴」，通典邊防一同；宋書卷九七夷蠻傳、南史卷七九夷貊傳

下、太平御覽卷七八一四夷部二皆作「映」。

〔三〇〕 扞率五品 「扞」，通典邊防一同，北史卷九四百濟傳、隋書卷八一東夷傳、太平御覽四夷部二皆作「杆」。

〔三一〕 奈率六品 「奈」，底本作「祭」，據萬本、中大本、庫本、傳校及北史百濟傳、隋書東夷傳、通典邊防一、太平御覽四夷部二改。

〔三二〕 劼音俠 「俠」，底本作「狹」，據萬本、傳校及通典邊防一改。

〔三三〕 夫餘昌 「昌」，底本作「璋」，萬本、庫本同，中大本缺。按北史百濟傳、通典邊防一皆載：「隋開皇初，其王夫餘昌遣使貢方物，拜爲帶方郡公、百濟王。」隋書東夷傳載：「開皇十八年，餘昌來獻方物，昌死，子餘宣立，死，子餘璋立。」大業三年，璋遣使者燕文進朝貢。」則隋開皇初，其王爲餘昌，大業時爲餘璋，此「璋」爲「昌」字之誤，據改。

〔三四〕 百濟懷二 「懷二」，底本作「恨之」，萬本、中大本皆作「懷二」，傳校改同。庫本作「懷」，下闕。按舊唐書卷一九九上東夷傳：「太宗親征高麗，百濟懷二。」則作「懷二」是，據改。

〔三五〕 金連 「連」，萬本據文獻通考改爲「漣」。按新唐書卷二二〇東夷傳亦作「漣」，則宜作「漣」。

〔三六〕 夫餘崇 按舊唐書東夷傳、新唐書東夷傳皆作「夫餘隆」，此避唐玄宗諱而改。

〔三七〕 其國東西四百里 「國」，底本作「地」，據萬本、中大本、庫本及北史百濟傳、隋書東夷傳改。

〔三八〕 賦稅以布絹麻米等 「米」，底本作「木」，萬本、庫本同，按北史百濟傳：「賦稅以布、絹、絲、麻及

米等。』通典邊防一同，此「木」爲「米」字之誤，據改。

〔三〕 其上出黃漆樹 「出」，底本作「多」，據萬本、庫本、傅校及通典邊防一改。

〔三〇〕 似小擾樹而大 「擾」，庫本同，萬本作「棕」，太平御覽四夷部二作「擾」，此「擾」蓋爲「擾」字之誤。

〔三〕 地合方四千餘里 「合」，底本作「各」，萬本、庫本同，據後漢書東夷列傳、通典邊防一、太平御覽卷七八〇四夷部一引後漢書改。

〔三〕 儉側 「儉」，後漢書東夷列傳、太平御覽四夷部一同，通典邊防一作「險」。

〔三〕 樊濊 「濊」，通典邊防一同，後漢書東夷列傳作「祗」，太平御覽四夷部一作「祗」。

〔三〕 乃將其餘衆數千人走入海 「走」，底本無，據萬本、庫本、傅校及後漢書東夷傳、通典邊防一、太平御覽四夷部一補。

〔三〕 公孫康分屯有有鹽二縣以南荒地爲帶方郡 原校：「按魏志云：『建安中，公孫康分屯有縣以南荒地爲帶方郡』，無有鹽縣，今記乃通典之文，未知據何書。」按兩漢樂浪郡有屯有縣，載於漢書地理志、續漢書郡國志，無有鹽縣。

〔三〕 俗信鬼神 「信」，底本作「重」，據萬本、庫本及通典邊防一、太平御覽四夷部一改。

〔三〕 主祭天神 「神」，底本作「地」，萬本、庫本同，據後漢書東夷傳、太平御覽四夷部一改。